



PERAK

Amaran!

Pihak Jabatan Agama Islam Perak tidak bertanggungjawab ke atas sebarang penambahan ayat selain daripada kandungan khutbah yang dikeluarkan.

## “MUHASABAH DIRI PADA AKHIR TAHUN 2022 MASIHI”

30 Disember 2022 / 6 Jamadil Akhir 1444

الْحَمْدُ لِلَّهِ<sup>1</sup> الْقَائِلِ:

﴿يَا أَيُّهَا الَّذِينَ ءَامَنُوا اتَّقُوا اللَّهَ وَلْتَنْظُرْ نَفْسٌ مَّا قَدَّمَتْ لِغَدٍ وَاتَّقُوا اللَّهَ إِنَّ اللَّهَ خَبِيرٌ بِمَا

تَعْمَلُونَ ﴿١٨﴾

Bermaksud: Wahai orang-orang yang beriman! Bertakwalah kepada Allah (dengan mengerjakan suruhan dan menginggalkan larangan Nya) dan hendaklah tiap-tiap diri melihat dan memerhatikan apa yang ia telah sediakan (dari amal-amalnya) untuk hari esok (hari akhirat). Dan (sekali lagi diingatkan) bertakwalah kepada Allah, sesungguhnya Allah amat Meliputi Pengetahuan Nya akan segala yang kamu kerjakan.

(Surah al-Hasyr ayat 18)

أَشْهَدُ أَنْ لَا إِلَهَ إِلَّا اللَّهُ وَحْدَهُ لَا شَرِيكَ لَهُ، وَأَشْهَدُ أَنَّ مُحَمَّدًا عَبْدُهُ وَرَسُولُهُ. اللَّهُمَّ صَلِّ وَسَلِّمْ عَلَى سَيِّدِنَا مُحَمَّدٍ<sup>2</sup> وَعَلَى آلِهِ وَأَصْحَابِهِ وَالتَّابِعِينَ لَهُمْ بِإِحْسَانٍ إِلَى يَوْمِ الدِّينِ. أَمَّا بَعْدُ، فَيَا عِبَادَ اللَّهِ! اتَّقُوا اللَّهَ<sup>3</sup> أَوْصِيَكُمْ وَإِيَّايَ بِتَقْوَى اللَّهِ فَقَدْ فَازَ الْمُتَّقُونَ.

### Sidang Jumaat yang dirahmati Allah,

Marilah kita tingkatkan ketakwaan kepada Allah SWT, dengan melaksanakan segala perintah, dan menjauhi segala larangan Nya; mudah-mudahan hidup kita diberkati Allah. Marilah juga kita rafakkan kesyukuran yang setinggi-tingginya ke hadrat Allah SWT, atas kurniaan Nya terus memberikan usia, membolehkan kita kekal bernafas untuk bersolat Jumaat pada hari ini. Dengan izin Nya juga, insyallah, pada hari Ahad nanti, kita akan melangkah masuk ke tahun 2023 Masihi. Mimbar akan memperdengarkan khutbah bertajuk:

**“MUHASABAH DIRI PADA AKHIR TAHUN 2022 MASIHI”**

<sup>1</sup> Memuji Allah

<sup>2</sup> Selawat ke atas Nabi Muhammad SAW

<sup>3</sup> Pesan Taqwa



Muhasabah bermaksud membuat penilaian dan semakan untuk melakukan pembaikan terhadap diri sendiri agar dapat dibina keyakinan yang lebih kukuh. Kenapakah perlu bermuhasabah? Muhasabah ialah satu permulaan yang baik untuk membolehkan kita melihat kebaikan dan keburukan yang telah kita lakukan sepanjang melayari perjalanan hidup. Muhasabah menuntut kita merenung kembali akan kekurangan yang perlu dibaiki dan kebaikan yang perlu digandakan lalu mengupayakan kita memperbaiki diri menjadi insan yang lebih baik.

Muhasabah menjadikan seseorang kembali sedar akan kekurangan dan keburukan yang pernah dilakukan sama ada secara sedar dan secara sengaja ataupun secara tidak sedar dan tidak sengaja, agar dapat diperbetulkan. Muhasabah juga memungkinkan seseorang menyusun perancangan dalam usaha membuat perubahan diri. Muhasabah haruslah disusuli dengan taubat nasuha dan azam serta tekad yang kuat untuk menjadi mukmin yang lebih baik; bermaksud melakukan perubahan hidup, mempertingkatkan kualiti diri, cara berfikir yang bijak dan matang, cara berkomunikasi yang berhemah, budaya kerja yang baik serta meninggalkan keburukan yang pernah dilakukan.

Muhasabah membolehkan kita menyedari akan peranan manusia ciptaan Ilahi. Manusia dicipta dengan dipertanggungjawabkan amanah oleh Allah SWT untuk menjadi khalifah memakmurkan bumi dengan melakukan kebaikan. Persoalan yang wajib kita bertanya pada diri sendiri, sepanjang bergelar khalifah Allah SWT ini, sejauh manakah kesungguhan kita menggalasnya? Adakah sempurna kita lakukan perkara-perkara yang difardukan kepada kita? Adakah kita memiliki peribadi dan akhlak menurut yang diredhai oleh Ilahi? Adakah kita mengambil berat terhadap kesusahan orang-orang yang amat memerlukan pertolongan? Adakah pendapatan kita daripada sumber yang halal? Apakah daya usaha kita untuk mencegah kemungkaran? Apakah kesungguhan kita untuk memakmurkan rumah-rumah Allah? Apakah azam kita untuk melangsaikan hutang, menunaikan zakat, memberi wakaf dan sedekah? Begitu banyak soalan yang boleh diajukan kepada diri kita apabila kita memperuntukkan masa untuk melakukan muhasabah.

### **Muslimin yang dirahmati keredaan Ilahi,**

Ayat 18 surah al-Hasyr yang dibacakan pada permulaan khutbah, memperingatkan agar ummah menyediakan amal secukupnya sebagai bekalan ketika berdiri di hadapan Allah Rabbuljalil. Renungi diri masing-masing, sama ada kita selama ini



telah melaksanakan perintah-perintah Ilahi. Jika kita masih belum sempurna solat lima waktu sehari-semalam, sempurnakanlah! Jika kita masih belum menunaikan zakat, tunaikanlah! Jika kita jarang melangkahkan kaki ke masjid untuk bersolat jemaah, tingkatkan kehadiran kita di masjid! Jika kita berlagak sombong dan meninggi diri, berubahlah kepada sifat insani yang lebih merendahkan diri. Jika kita masih menanggung hutang, utamakan pendapatan untuk melangsaikan hutang. Jika kita masih bersengketa sesama ahli keluarga, suami isteri, kenalan atau sesiapa pun, berdamailah! Jika kita seorang yang tiada keyakinan diri, tingkatkan ilmu dan pengetahuan, pelajari daripada pengalaman untuk membina keyakinan diri.

Segala yang terjadi di dunia ini, semuanya mempunyai sebab tertentu. Kadangkala apa yang berlaku di sekeliling kita memerlukan kita bermuhasabah, kerana setiap perbuatan dan tindakan yang dilakukan, akan mendatangkan kesan. Bencana alam, banjir besar, tanah runtuh dan sebagainya, meskipun berlaku dengan ketentuan Ilahi, tetapi Allah SWT juga menurunkan bencana sebagai peringatan kepada manusia yang telah melakukan kezaliman terhadap bumi yang pada asalnya dicipta Ilahi dengan segala keseimbangan semula jadi, tetapi tangan-tangan manusia yang telah merosakkan keseimbangan tersebut.

Wahai orang-orang yang beriman! Insaflah! Segala tindak tanduk kita di dunia ini akan bermula hitungannya sebaik sahaja kita dimasukkan ke dalam kubur. Apabila tibanya hari kiamat, kita akan dibangkitkan dari kubur, akan bermulalah proses hitungan yang dilakukan oleh Tuhan yang Menguasai hari perhitungan. Firman Allah SWT:

﴿يَوْمَ يَصْدُرُ النَّاسُ أَشْتَاتًا لِيُرَوْا أَعْمَالَهُمْ ۗ فَمَنْ يَعْمَلْ مِثْقَالَ ذَرَّةٍ خَيْرًا يَرَهُ ۗ وَمَنْ يَعْمَلْ مِثْقَالَ ذَرَّةٍ

شَرًّا يَرَهُ ۗ﴾

Bermaksud: Pada hari itu manusia akan keluar berselerak (dari kubur masing-masing) untuk diperlihatkan kepada mereka balasan amal-amal mereka. Maka sesiapa berbuat kebajikan seberat zarah, nescaya akan dilihatnya (dalam surat amalnya) Dan sesiapa berbuat kejahatan seberat zarah, nescaya akan dilihatnya.

(Surah Al-Zalzalah ayat 6 hingga 8)



## Sidang Jemaah yang dimuliakan,

Khatib berpesan, segeralah beringat, bahawa hidup semakin singkat, esok atau lusa, kita akan menerima jemputan daripada Illahi untuk berangkat ke alam barzakh menuju akhirat. Oleh itu, ambillah masa untuk menginsafi segala ketelanjuran dengan azam mahu melakukan perubahan ke arah lebih baik. Hayatilah firman Allah SWT dalam surah al-Qariah ayat 6 hingga 11, memperingatkan agar kita memberatkan timbangan amal dengan amal kebaikan agar beroleh kehidupan yang diredai Allah SWT.

﴿ فَأَمَّا مَنْ ثَقُلَتْ مَوَازِينُهُ ۖ فَهُوَ فِي عِيشَةٍ رَاضِيَةٍ ﴿٧﴾ وَأَمَّا مَنْ خَفَّتْ مَوَازِينُهُ ۖ فَأُمُّهُ هَاوِيَةٌ ﴿٨﴾ وَمَا أَدْرَاكَ مَا هِيَ ۖ نَارٌ حَامِيَةٌ ﴿٩﴾ ﴾

Bermaksud: Barang siapa yang berat timbangan kebajikannya maka ia akan berada dalam kehidupan yang menggembirakan (yang diredai Allah) dan barang siapa yang ringan timbangan kebajikannya maka tempat kembalinya ialah neraka Hawiah. Tahukah kamu apakah neraka Hawiah itu? Ia ialah api yang sangat panas.

## Para Tetamu Allah yang dimuliakan,

Mimbar menitipkan beberapa peringatan:

**Pertama:** Muhasabah diri membolehkan kita membuka hati dan menyedari akan kesilapan dan dosa yang pernah dilakukan. **Kedua:** Perbanyakkan taubat memohon keampunan Allah SWT akan kesilapan lalu, seterusnya berdoa bersungguh-sungguh memohon taufik dan bimbingan Nya agar kita menggandakan kebaikan dan meninggalkan keburukan. **Ketiga:** Membuat jadual semakan secara harian atau mingguan, perhitungan kekurangan diri, tanggungjawab yang difardukan agar tidak terabai, juga menyenaraikan amalan dan aktiviti yang dapat meningkatkan kualiti diri serta bermanfaat pada diri, keluarga dan masyarakat.

بَارَكَ اللَّهُ لِي وَلَكُمْ بِالْقُرْآنِ الْعَظِيمِ وَنَفَعَنِي وَإِيَّاكُمْ بِمَا فِيهِ مِنَ الْآيَاتِ وَالذِّكْرِ الْحَكِيمِ وَتَقَبَّلَ مِنِّي وَمِنْكُمْ تِلَاوَتَهُ إِنَّهُ هُوَ السَّمِيعُ الْعَلِيمُ. أَقُولُ قَوْلِي هَذَا وَأَسْتَغْفِرُ اللَّهَ الْعَظِيمَ لِي وَلَكُمْ وَلِسَائِرِ الْمُسْلِمِينَ وَالْمُسْلِمَاتِ وَالْمُؤْمِنِينَ وَالْمُؤْمِنَاتِ الْأَحْيَاءِ مِنْهُمْ وَالْأَمْوَاتِ فَاسْتَغْفِرُوهُ إِنَّهُ هُوَ الْعَفُورُ الرَّحِيمُ.



## Khutbah Kedua

الْحَمْدُ لِلَّهِ<sup>4</sup> حَمْدًا يُؤَافِي نِعْمَهُ وَيُكَافِي مَزِيدَهُ. أَشْهَدُ أَنْ لَا إِلَهَ إِلَّا اللَّهُ وَحْدَهُ لَا شَرِيكَ لَهُ، وَأَشْهَدُ أَنَّ سَيِّدَنَا مُحَمَّدًا عَبْدَهُ وَرَسُولَهُ. اللَّهُمَّ صَلِّ وَسَلِّمْ عَلَى سَيِّدِنَا مُحَمَّدٍ<sup>5</sup> وَعَلَى آلِهِ وَأَصْحَابِهِ أَجْمَعِينَ. أَمَّا بَعْدُ، فَيَا عِبَادَ اللَّهِ! اتَّقُوا اللَّهَ<sup>6</sup> وَكُونُوا مَعَ الصَّادِقِينَ.

### Muslimin yang dirahmati Allah,

Mimbar menyeru para jemaah agar tetap berpegang kepada aqidah Islamiah berteraskan Ahli Sunnah Waljamaah, yang menjadi warisan Rasulullah SAW, sahabat dan tabiin. Jagalah hubungan dengan Allah SWT dan sesama manusia. Makmurkan rumah-rumah Allah dengan istiqamah mengerjakan ibadah, terutama solat fardu berjemaah. Perbanyakkan selawat dan salam ke atas Junjungan Besar Nabi Muhammad SAW.

إِنَّ اللَّهَ وَمَلَائِكَتَهُ يُصَلُّونَ عَلَى النَّبِيِّ يَا أَيُّهَا الَّذِينَ ءَامَنُوا صَلُّوا عَلَيْهِ وَسَلِّمُوا تَسْلِيمًا<sup>7</sup>  
اللَّهُمَّ صَلِّ عَلَى مُحَمَّدٍ وَعَلَى آلِ مُحَمَّدٍ كَمَا صَلَّيْتَ عَلَى إِبْرَاهِيمَ وَعَلَى آلِ إِبْرَاهِيمَ  
وَبَارِكْ عَلَى مُحَمَّدٍ وَعَلَى آلِ مُحَمَّدٍ كَمَا بَارَكْتَ عَلَى إِبْرَاهِيمَ وَعَلَى آلِ إِبْرَاهِيمَ فِي  
الْعَالَمِينَ إِنَّكَ حَمِيدٌ مَجِيدٌ. اللَّهُمَّ اغْفِرْ لِلْمُسْلِمِينَ وَالْمُسْلِمَاتِ وَالْمُؤْمِنِينَ  
وَالْمُؤْمِنَاتِ<sup>8</sup>، وَأَصْلِحْ ذَاتَ بَيْنِهِمْ وَأَلِّفْ بَيْنَ قُلُوبِهِمْ وَاجْعَلْ فِي قُلُوبِهِمُ الْإِيمَانَ  
وَالْحِكْمَةَ، وَثَبِّتْهُمْ عَلَى مِلَّةِ رَسُولِ اللَّهِ ﷺ.

**Ya Allah! Ya Rabbulalamin!** Kami mohon agar segala kebaikan kami diterima dan segala kesilapan kami diberikan keampunan oleh Mu. Bimbing hati dan jasad kami mudah mentaati Mu agar kami beroleh keredaan di dunia dan dikurniakan tempat di syurga Mu.

<sup>4</sup> Memuji Allah

<sup>5</sup> Selawat ke atas Nabi Muhammad SAW

<sup>6</sup> Pesan Taqwa

<sup>7</sup> Ayat Al-Quran

<sup>8</sup> Doa untuk Kaum Muslimin



**Ya Mannan! Ya Razzaq!**, berkatilah hamba Mu yang melaksanakan tuntutan zakat, wakaf dan sedekah. Kurniai mereka rezeki yang berlipat ganda, serta sucikanlah harta dan jiwa mereka; jauhi golongan *fuqara* dan *masakin* daripada kekufuran dan kefakiran yang berpanjangan.

**Ya Dzal Jalaali wal Ikram!**, jadikanlah kami antara hamba Mu yang memelihara amanah. Kuatkan iman kami agar menjauhi perbuatan khianat seperti salah guna harta benda bukan milik kami, memberi atau menerima rasuah, menyalahgunakan kuasa untuk kepentingan diri, serta jauhkan kami termasuk dalam golongan yang mengabaikan tanggungjawab yang diamanahkan.

**Ya Maalikal Mulk!**, jauhi negara kami daripada kehancuran disebabkan perbuatan rasuah; serahkan tanggungjawab pimpinan dan pengurusan negara kami kepada kalangan hamba Mu yang amanah dan ikhlas, serta tegas lagi berani menegakkan kebenaran dan melaksanakan keadilan berlandaskan hukum.

**Ya Malik! Ya Hadi!**, kurniakanlah taufik dan hidayah Mu terhadap raja kami, Duli Yang Maha Mulia Paduka Seri Sultan Perak Darul Ridzuan, Sultan Nazrin Muizzuddin Shah Ibni Almarhum Sultan Azlan Muhibbuddin Shah Al-Maghfur-Lah, dan Raja Permaisuri Perak Darul Ridzuan Tuanku Zara Salim serta kerabat diraja dan seluruh rakyat jelata.

رَبَّنَا آتِنَا فِي الدُّنْيَا حَسَنَةً وَفِي الْآخِرَةِ حَسَنَةً وَقِنَا عَذَابَ النَّارِ

فِيَا عِبَادَ اللَّهِ، ﴿إِنَّ اللَّهَ يَأْمُرُ بِالْعَدْلِ وَالْإِحْسَانِ وَإِيتَايَ ذِي الْقُرْبَىٰ وَيَنْهَىٰ عَنِ الْفَحْشَاءِ وَالْمُنْكَرِ وَالْبَغْيِ يَعِظُكُمْ لَعَلَّكُمْ تَذَكَّرُونَ﴾ ﴿فَاذْكُرُوا اللَّهَ الْعَظِيمَ يَذُكُرْكُمْ، وَاشْكُرُوا لَهُ عَلَىٰ نِعْمِهِ يَزِدْكُمْ، وَاسْأَلُوهُ مِنْ فَضْلِهِ يُعْطِكُمْ، وَلَذِكْرُ اللَّهِ أَكْبَرُ، وَاللَّهُ يَعْلَمُ مَا تَصْنَعُونَ.﴾